



**MANGSA banjir yang ditempatkan di Sekolah Kebangsaan (Felda) Sungai Kelamah, Tampin semalam.**



**SEORANG anggota polis membuat pemantauan di laluan dinaiki air di Jalan Kota Tinggi-Mersing di Mersing semalam.**

Jumlah penduduk ke PPS di Johor, Negeri Sembilan, Melaka dan Sabah meningkat

# Banjir di empat negeri makin buruk

Oleh **SUBKHI SUDARJI, MOHAMAD FAIZAL HASHIM dan NOR AINNA HAMZAH**

**PETALING JAYA** – Situasi banjir di empat negeri iaitu Johor, Negeri Sembilan, Melaka dan Sabah semakin buruk berikutan pertambahan penduduk yang ditempatkan di pusat pemindahan sementara (PPS) secara berperingkat bermula kelmarin.

Di **Johor**, setakat pukul 5 petang semalam, jumlah mangsa banjir terus meningkat kepada 2,278 orang daripada 611 keluarga membabitkan daerah Segamat, Kota Tinggi dan Tangkak.

Peningkatan jumlah mangsa itu menyaksikan sebanyak 39 PPS dibuka di tiga daerah terbabit.

Pengerusi Jawatankuasa Kesihatan dan Alam Sekitar negeri, R. Vidyananthan dalam satu

## Bilangan mangsa banjir

	BILANGAN MANGSA	BILANGAN PPS
• Johor	2,278	39
• N. Sembilan	1,961	19
• Melaka	1,456	19
• Pahang	1,547	48
• Sabah	1,082	17
• Terengganu	137	2
• Kelantan	50	1
<b>JUMLAH</b>	<b>8,511</b>	<b>145</b>

Data InfoBencanaJKM setakat pukul 6 petang

kenyataan berkata, ramalan cuaca Jabatan Meteorologi Malaysia (MetMalaysia) menunjukkan hujan lebat berterusan dijangka berlaku di Tangkak, Segamat, Muar, Batu Pahat, Kluang, Mersing dan Kota Tinggi.

Susulan bencana banjir itu

juga, tambahnya, jalan ke Kampung Orang Asli Peta dan jalan ke Kampung Orang Asli Penan, Mersing; Jalan Bangas, Kampung Simpang Loi dan Jalan Putting, Segamat ditutup setelah dinaiki air 0.5 sehingga 1 meter.

Di **Negeri Sembilan**, seramai 1,961 penduduk dipindahkan ke 19 PPS dengan daerah Tampin paling teruk terjejas dan melibatkan 1,448 mangsa.

Pengerusi Jawatankuasa Pengurusan Bencana Daerah (JPBD) Tampin, Suhaiza Sharudin berkata, susulan hujan lebat berterusan dan kejadian banjir, dua lagi pusat PPS di daerah ini dibuka menjadikan keseluruhan lapan PPS masih beroperasi khususnya di Gemas.

“PPS Sekolah Menengah Kebangsaan (SMK) Gemas telah dibuka untuk pemindahan penduduk dari Taman Sungai Ge-

mas yang sedang bersedia untuk dipindahkan atas faktor keselamatan dengan bacaan paras air sungai di tahap bahaya,” katanya dalam satu kenyataan semalam.

**Melaka dan Sabah** pula masing-masing mencatatkan seramai 1,456 dan 1,082 mangsa ditempatkan di PPS setakat pukul 5 petang semalam.

Sementara situasi banjir di **Pahang** semalam tidak banyak berubah apabila seramai 1,547 mangsa masih berada di 48 PPS berbanding 1,872 mangsa di 41 PPS kelmarin.

Sehubungan itu, seramai 7,527 anggota bomba dan penyelamat serta 438 aset telah diatur gerak di enam buah negeri bagi menghadapi sebarang kemungkinan gelombang kedua banjir.

Menteri Perumahan dan Kerajaan Tempatan, Datuk Seri Reezal Merican Naina Merican berkata,

pasukan bomba dan penyelamat juga berada dalam keadaan berjaga-jaga khususnya di Pantai Barat yang dijangka mengalami fenomena air pasang besar sehingga 5 Januari 2021.

Dalam pada itu, Jabatan Pengairan dan Saliran (JPS) berkata, penduduk di pesisir pantai khususnya di Pantai Barat Semenanjung diminta berwaspada ekoran fenomena air pasang besar yang dijangka berlaku selama empat hari bermula semalam sehingga Rabu ini.

“Fenomena ini dijangka berskala lebih kecil berbanding November lalu. Namun, keadaan akan menjadi lebih buruk sekiranya fenomena ini disertai angin kencang, ombak besar dan hujan lebat yang berlaku serentak.

“Ia akan menyebabkan berlakunya banjir kilat, limpahan air laut dan banjir pantai,” katanya.